



গিলছি আমি মহাবিশ্ব

খন্দকার জাহিদ হাসান

গিলছি আমি বসতবাড়ী
আমার আয়ুর বিনিময়ে
জীবনরূপী মোমবাতিটা
বড়োই দ্রুত যাচ্ছে ক্ষয়ে।

গিলছি আমি অভিবাসন
জন্মভূমির বিনিময়ে
স্বজনহারা করুণ বাতাস
চতুর্দিকে যাচ্ছে বয়ে।

গিলছি আমি অর্থকড়ি
আমার শ্রমের বিনিময়ে
ব্যস্ত সময় যাচ্ছে কেটে
তালো থাকার অভিনয়ে।

গিলছি আমি শিল্পকলা
আমার রূচির বিনিময়ে
স্বপ্নচারী মনপাঞ্চাটার
কাটছে জীবন দুঃসময়ে।

গিলছি আমি জ্ঞান-বিজ্ঞান
বোধহীনতার বিনিময়ে
জানা-বোঝার বিড়ম্বনা
দিবারাত্রি যাচ্ছি সয়ে।

গিলছি আমি প্রিয়ার বদন
চোখের জলের বিনিময়ে
শ্যামের নিঠুর বাঁশীর টানে
চুটছে রাধা হন্যে হয়ে।

গিলছি আমি সভ্যতাকে
অসভ্যতার বিনিময়ে
আমার এ-পথ কোথায় গেছে
অজানাই তা যাচ্ছে রয়ে।

গিলছি আমি চন্দ্ৰ-সূর্য
এই পৃথিবীর বিনিময়ে
প্রযুক্তি আজ আকাশমুখী
জীবন-সত্তা কাপছে ভয়ে!

গিলছি আমি মহাবিশ্ব
মহাপ্রভূর বিনিময়ে
নাচছে বিশ্বরক্ষান্ত
মহাকাব্যের এই বিজয়ে!!



খন্দকার জাহিদ হাসান, সিডনী, ১৮/০৮/২০০৭

লেখকের আগের লেখা ও কবিতাগুলো পড়তে এখানে টোকা মারুন